

TORITENY - ALAHADY faha-25 TSOTRA - TAONA D



Tsy mahay manompo an'Andriamanitra sy ny harena ianareo”.

Ry kristianina havana, amin'izao Alahady faha-25 manadavantaona izao dia mananatra atsika ny tenin'Andriamanitra arosan'ny Eglizy ho sakafom-panahy hamelombelona ny finoantsika hahafahantsika hahay hampitraotra ny finoana sy ny fiainana andavanandro. Mananatra atsika ireo tenin'Andriamanitra ireo hahay hampiasa ny vola na ny marimarina kokoa hahafantatra tsara ny anjaran'ny vola eo amin'ny fiainana, tsy inona fa ny vola dia atao hanompo fa tsy tompoina, atao hifanasoavana ny vola fa tsy atao hanapotehana ny fiombonana sy ny fihavanana. Indrisy anefa fa amin'ny adim-piainana isankarazany amin'izao vaninandrantsika izao, dia efa lasa Andriamanitra mihitsy ny vola ka izy no tompoina. Nefa fantantsika fa tsy mahasoa izay satria ny fitiavan-tena no manjaka noho izay vola atao ho Andriamanitra izay ka raha ny fitiavan-tena dia mazava ho azy fa

hahilikilika ny hafa indrindra ny madinika. Atao izay hanaratsiana azy ireo, hanimba azy ireo ary hitantsika izany eo amin'ny fiainantsika andavanandro. Izay no ampianarin'ny Amosy mpaminany amintsika : "tandreho hoy izy mba tsy ny vola no entintsika hanapotehana ny fifandraisana amin'ny hafa, tandremo ireny fihetsika mamoafady amin'ny

Vakiteny I : Am. 8, 4-7

Salamo : Sal. 112

Vakiteny II : 1 Tim. 2, 1-8

Evanjely : Lk. 16, 1-13

alalan'ireny risoriso sy ny fitapitaka ireny" Ary hitantsika amin'izany ry Kristianina havana fa ny

fontsika olombelona raha lavitra an'Andriamanitra, raha tsy i Jesoa no ivompianantsika dia simba io fontsika io ary nahatonga atsika lavo tamin'ny fahotana tamin'ny fototra. Enontsika tamin'ny vakiteny voalohany ny anatra naton'i Amosy tamin'ny vahoaka tamin'izany fotoana izany fa indrindra ireo manam-pahefana sy ireo manambola izay mitady ny fomba rehetra hampitomboana an'izany vola izany noho ny fitiavan-tena ka mahatonga azy ireo hanao ny fitapitaka amin'ny atao sy amin'ireo rehetra hifandraisany. Mazava ho azy fa ny mahantra no voahilikilika, dia very zo sy tsy manjaka intsony ny rariny sy ny hitsiny fa ny korontana no manjaka koa amin'ny fiainantsika ankehitriny.

Izay indrindra no iantsoan'ny Papa Ray masina antsika fa indrindra amin'izao taona masina famindram-po izao mba hiova ny fontsika ilay fo vato ho tonga fo nofo mba afaka hikarakara sy hanasoa ny hafa. Manomboka amin'ireo manam-pahefana izany manomboka amin'ireo mpikarakara ny fiainanam-bahoaka tahaka nolazain'ny Md Paoly ao amin'ny vakiteny faharoa, mba hitondra ambavaka an'ireo mpitondra isika mba hiova koa ny fo amam-panahin'izy ireo ka ny fanahy masina no hanilo azy ireo hikatsaka ny soa iombonana, hikatsaka izay mahasoa ny vahoaka amin'izay hanjaka ny fiadanana sy ny fandriam-pahalemana.

Ambaran'i Jesoa fa ho tanteraka izay rehetra izay raha mahay misafidy isika izany hoe tsy ny vola no tompointsika fa Andriamanitra, tsy misy afaka hanompo tompo roa hoy i Jesoa ao amin'ny Evanjely. Ataontsika matetika io sasinkira salamo io : na izy hankahala an'Andriamanitra ka hanompo ny vola na izy hanompo an'Andriamanitra ka hampiasa ny vola ho entiny hanompoana an'Andriamanitra. Ary dia izay no atintraterin'ny fanoharana ataon'i Jesoa izay hahitantsika ny fitapitakin'izao tontolo izao, ireo izay mivelona anatin'ny fitapitaka sy ny lainga ary ny risoriso ka dia nampianarin'i Jesoa isika mba hahay hanana ny fahendren'Andriamanitra dia tsy inona fa Andriamanitra: hahafahantsika hahatoky azy amin'ny rehetra. Ary matetika isika no milaza fa ny Andriamanintsika dia tsy arak'izay eritreretentsika io, ny Andriamanintsika dia be famindrampo ary naniraka an'i Jesoa eto anivontsika izay nahafoy ny ainy, nanompo i Jesoa..Ny dikan'ny hoe manompo dia mitady hahasoa ny hafa.

Izay no azo lazaina ho foto-pampianarana amin'izao Alahady faha-25 mandavantaona izao, atao hanompo isika izany hoe hanasoa ny hafa ary raha manao izany isika dia mifanasoa ka mahatonga atsika ao anatin'ny fihavanana marina, fianakaviamben'Andriamanitra, ho olo araiky ao amin'andriamanitra ka hiadam-pinaritra.

Ry Jesoa Tomponay ô, nampianarinao anay androany sady fiainanao rahateo fa hoe tsy natao hotompoina ny vola aman-karena fa ho entina manompo ny manodidina, ny namana, hanasoa ny namana sy hanompo an'Andriamanitra. Enga anie izahay hahay hifidy anao ry Jesoa, ianao tokoa no eo anivon'ny fiainanay fa tsy ny vola. Ary ny vola ho entinay hitsinjovana sy hanasoa ny hafa. Enga anie ireo manana toerana sy andraikitra amin'ny fitondrana mba ho tsolovin'ny fanahy masina ka tsy ho resin'ny fitiavan-tena, tsy ho resin'ny vola na ny risoriso fa tena mba ho mpanasoa vahoaka ho mpanatsara ny fiainam-bahoaka tokoa izy ireo. Ampianaro izahay mba ho tena mpanomponao tokoa ka hahay hanorina ny fanjakanao hanjakan'ny rariny sy ny hitsiny, hanjakan'ny fifankatiavana ka ho tanteraka eto aminay tokoa ny fiadananao. Amen

Mompera Arseveka Mgr Benjamin Ramarason